

PN elimina fundu veteranu biliaun \$1

DILI, 20 dezembru 2022 (TATOLI)-Parlamentu Nasionál (PN) liu hosi votasaun finál globál halo reformulasaun ba dekretu PN númeru 68/V-Orsamentu Jerál Estadu (OJE) ba 2023, hodi elimina fundu veteranu biliaun \$1 ne'ebé Tribunál Rekursu (TR) deklara inkonstituisionalidade.

"Rezultadu votasaun a-favór 40, kontra 0, abstensaun 20, nune'e diploma ne'ebé ita halo alterasaun ba norma ne'ebé deklara inkonstituisional aprova no pruntu atu envia hetan promulgasaun hosi Prezidente Repúblika," Prezidente Parlamentu Nasionál, Aniceto Longuinhos Guterres Lopes, hateten iha reuniaun plenária PN, tersa ne'e.

Enkuantu PN halo uluk diskusaun no aprovasaun reformulasaun ba dekretu PN númeru 68/V-Orsamentu Jerál Estadu (OJE) ba 2023 iha jeneralidade, espesialidade mak kontinua iha finál globál.

Pedidu ne'e hato'o hosi Prezidente Repúblika hodi husu ba órgaun lejislativu halo reformulasaun ligadu ho Xefe Estadu nia pedidu ba iha Tribunál Rekursu (TR) hodi halo fiskalizasaun preventiva ba fundu veteranu biliaun \$1 ne'ebé prevee iha proposta-lei OJE 2023 katak inkonstituisionalidade.

Ministru Finansa (MF), Rui Augusto Gomes, hateten presiza halo ajustamentu textu finál lei OJE 2023 tuir desizaun Tribunál nian tanba TR deklara inkonstituisionalidade, fundu ida-ne'e PN presiza halo reformulasaun diploma tuir desizaun tribunal.

Purtantu atu avansa lalais ho publikasaun lei Orsamentu Jerál Estadu (OJE) 2023, presiza espulga norma inkonstituisional.

"Eliminasaun relativa fundu kombatente libertasaun nasional ne'e sei la afeta OJE 2023. Orsamentu ida-ne'e kontinua foka nafatin ba investimentu produtivu no krésimu ekonomiku nune'e Governu solisita Parlamentu Nasionál atu elimina liña fundu ne'e no aprovasaun OJE 2023, nune'e lei ne'e haruka ba publikasaun iha jornál repúblika hodi fasilita ezekusaun iha fulan-janeiru 2023," nia hateten.

Governante ne'e hateten, iha OJE 2023 prevee dotasaun ida ho valór biliaun \$1 ba fundu kombatente libertasaun nasional, fundu ida-ne'ebé kria liuhosi orsamentu retifikativu 2022 maibé bainhira TR hetan solisitasaun atu pronúnsia fundu refere mak TR konsidera inkonstituisionalidade tanba viola prinsípiu proporsionalidade autorizasaun justu no igualitária rekursu natural.

"Governu la konkorda fundamentasaun ida-ne'e maibé respeita desizaun saida de'it hosi TR no tanba fundu ne'e konsidera hanesan inkonstituisional mak agora lakon tiha ona nia efeitu no ita presiza halo ajustamentu iha lei OJE tinan oin liuhosi eliminasaun liña relativa fundu ne'e rasik nune'e sei redús," nia hateten.

Mezmu nune'e, konstituisaun estabesele hodi rekoñese no valoriza rezisténsia sekulár povu maubere kontra dominasaun estranjeiru no kontributa hotu hosi independénsia nasional ida-ne'e obriga Estadu atu asegura protesaun espesial ba kombatente libertasaun nasional.

"Intervensaun balun ita halo ona liuhosi atribuisaun pensaun no apoiu sira seluk asaun sosiál, edukasaun, saúde, empregu, asesu ba kréditu, atividade oioin maibé ita hotu hatene uniku finansiamentu mak fundu mina rai no fundu ne'e komesa tun daudaun ona. Tanba ne'e, ita presiza identifika fonte sira seluk se lae ita hasoru risku ne'ebé boot tebes hodi asegura protesaun espesial ba kombatente iha future," nia fundamenta.

Tanba razaun ne'e mak Governu propoin kriasaun fundu kombatente libertasaun nasional ida permite hamenus todan ba fundu petróleu ho intensaun atu investe fundu ne'e atu hetan nia retornu no depois bele finanzia despeza sira tomak ba benefisiu kombatente libertasaun nasional tomak.

Maibé, TR iha opiniaun diferenza no Governu respeita desizaun ida-ne'e, situasaun ne'e ezije duni PN hamutuk ho Governu tenke buka finansiamentu iha futuru hodi apoiu kombatente tanba ida área ne'e sei sai dezafiu boot iha futuru.

"Hakarak ka lakohi agora dadaun halo hela verifikasaun ba lista foun ida inklui rihun 124 veteranu foun maibé saida mak ita presiza halo hodi oinsá atu asegura aprovasaun OJE ba 2023," nia hateten.

Deputadu CNRT, Aderito Hugo, hateten konkorda ho desizaun Tribunál tanba Governu la esplika kle'an didi'ak ba fundu ne'e tanba Governu apresenta iha orsamentu retifikativu 2022 ho karáter urjénsia de'it.

Deputadu Fretilin, David Dias Ximenes 'Mandati', respeita desizaun maibé fundu ne'e importante mós oinsá atu fasilita rejistu veteranu foun.

*Gabinete do Ministro das Finanças, Rui Augusto Gomes liu Facebook
20 Dezemburu 2022*

Parlamentu Nasionál Aprova iha Final Global Debate Reformulasaun Dekretu Parlamentu kona-ba Orsamentu Jeral Estadu 2023 ho montante total \$2.155.715.306

Díli, 20 Dezemburu 2022 – Parlamentu Nasionál liuhusi sesaun Plenária, ohin dadeer, aprova ona iha final global Proposta Reformulasaun Dekretu Parlamentu Nasionál número 68/V kona-ba Orsamentu Jeral Estadu 2023 ho montante total \$2.155.715.306 ho votu a favor 40, Kontra 0, no Abstensaun 20.

Montante despesas global \$2.155.715.306 ne'e kompostu husi Orsamentu Administraun Sentral \$1.800.000.000, Orsamentu Seguransa Sosial \$235,715.306 no RAEOA \$120.000.000

Total despesas global billiaun \$2,16 ne'e esklui ona Fundu Kombatentes Libertasaun Nasionál, billiaun \$1 ne'ebé mak foin lailais ne'e Tribunal Rekursus deklarara Inkonstitusional no automatikamente eliminadu husi kontas publikas ba 2023.

Hafoin halo aprovasaun iha final global, ekipa tekniku Ministériu Finansas hala'o reuni-aun ho tekniku Komisaun C ne'ebé trata asuntu Finansas Publikas, Parlamentu Nasionál hodi finaliza redasaun final inklui verifikasaun textu no número sira iha Tabela Orsamentál hodi ohin lorokraik Parlamentu Nasionál bele submete redasaun final Dekretu Foun Parlamentu Nasionál kona-ba OJE 2023 ho montante total \$2.155.715.306 ba Prezidente Repúblika atu promulga.

Sesaun Plenária ne'e prezide husi Prezidente Parlamentu Nasionál, Aniceto Longuinhos Guterres Lopes, akompaña husi membrus Meza Parlamentu Nasionál ho prezensa husi Ministru Finansas, Rui Gomes akompaña husi ekipa Gabinete Apoiu Jurídiku no ekipa Diresaun Jeral Planeamentu no Orsamentu Ministériu Finansas.

Antes ne'e, Parlamentu Nasionál liuhusi sesaun Plenária iha 17 Novemburu, aprova ona iha final global Proposta Lei Orsamentu Jeral Estadu 2023, ho montante total \$3.155.715.306 ho votu a favor 42, Kontra 21, no Abstensaun 2. ***